

030 老子玄通經

經名：老子玄通經。又名《天應經》。撰人不詳，約出於南北朝或唐代。一卷。《正統道藏》未收。底本出處：貞松堂藏敦煌寫本。

老子玄通經亦曰天應經

老子曰：夫道分靈布化，生成萬物，精係於天，質凝於地，人動作吉凶，莫不應之於天。故星象明耀，彰於禍福，所以聖人設教，令勤悔謝，奉行齋誠，建諸善功，慈仁忠孝，敬賢任能，濟惠貧弱，拯救危苦，愛養孤寡，撫育病痛，憫念蟲魚，不傷草木，放生贖命，開悟愚迷，慈心萬物，普度衆生，則諸天靈司列言，太上延壽益年，名書上清，天應嘉慶，富貴壽樂，子孫賢孝，智惠

聰明，門戶興盛，胤嗣不絕。若毒害傷割，讒諛諂佞，妒嫉良善，矯黠欺詐，貪取無厭，蠱道祝詛，殺伐衆生，不慈不孝，不義不仁，邪淫放縱，綺語妄言，嘖嘖自是，傲誕師尊，啖食酒肉，譖毀賢明，憎嫌老病，欺犯貧窮，不念善道，唯惡爲先，地官列刺，上聞諸天，削除生錄，北帝舉名，天應凶禍，衆惡相加，刀兵水火，虫獸虎狼，毒螫傷害，形獄繫閉，疾病灾厄，凶殃軼軻，貧窮孤寡，万事屯遭。世人凡愚，不信罪福，唯求衣食，貪聚財寶，以育子孫，終日造罪，未嘗修善，常謂此身千年不死，豈知臟滿命窮，神逝形亡，魂被收錄，送於酆都，晝夜考掠，辛苦備經，動則万劫，无有出期。吾念愚迷，說法度人。

老子曰：万兆云云，謂之行尸，飢能知食，寒知覓衣，不識宿命，不識因緣，豈知罪福，善惡吉凶，故諸天哀敏，降生聖人，與之作主，建國設官，擇賢選良，勸化人民，養育凡愚，使得安全。非欲自貴，馳聘淫奔，廣造宮苑，器服奢華，賦役勞苦，損害万人，遨遊田獵，

殺伐无度，峻其威刑，明其賞罰，動乖大道，不順人心，百姓怨酷，上聞於天，象靈暴怒，諸灾競生，水旱虫霜，温行疫疠，万癘交集，身滅國亡，古來暗主虐君，受其刑戮，亦何量哉。

老子曰：人主執生殺之命，群生父母行教之首，善惡吉凶，皆奉於君。君若行善，則万人亦善，君若行惡，則万人亦惡，君若清淨，万人忠正，君若貪濁，万人淫欲，舉動運爲，皆本於君。故人主者，常當清淨无爲，少私寡欲，則常守其國。

老子曰：天下鳥獸虫魚，萬物草木，一切有形在於土地者，悉是國主所化，若人君行善，則万物亦善，天應以善，國中之物，莫不皆善，故太平之世，君聖臣賢，父慈子孝，兄友弟悌，夫順妻貞，人民淳朴，草木滋茂，男女聰明，風雨調節，日月洞清，星辰合度，四氣平和，百穀豐稔，兆庶歡娛，毒虫惡草，不生於郊，祥禽靈獸，神芝玉英，靈雲吉瑞，天應休禎。若無道世，君暗臣愚，諂佞讒害，滿於朝廷，小人道長，君

子道窮，父子不穆，兄弟異居，夫妻異心，人民矯黠，男女醜陋。風雨不調，草木枯瘁，百穀不成，星宿失度，日月昏昏，百姓飢寒，人民死亡，毒草惡虫，隨處聚生，泉源枯塞，山岳崩摧，天裂地坼，雨血雨灰，攙搶枉矢，旬始縱橫，神吟鬼哭，万厲交并，水旱虫霜，兵寇死亡，万人怨訴，天應不祥。

老子曰：君爲其首，臣爲手足，人爲其身，君臣百姓，同一形也，有一不和，則身不安。治國養人，亦如治身，百節調適，形則長存，明君治國，先存於人，後存其身，所以長久，天下太平。

老子曰：人之所喜，富貴壽樂也，所以喜之，欲以資身，而求之過度，遂至顛危，不亦愚乎。夫飲食不過滿腹，衣服不過過形，車馬不過容體，宮宅不過藏身，而周身之外，並爲禍患，所以明君薄其飲食，廉其衣服，儉其車馬，卑其宮宅，省其遊娛，止其田獵，子孫昌熾，百姓安樂，而人愛之，過於父母。及至庸君暗主，窮天下之味，以供其口，殫天下之帛，以給其身，飾車馬以

充閑，廣宮宅以自居，百姓勞苦，怨訴於天，天應不祥，身死國殘，子孫絕滅，痛哉痛哉。

老子曰：富貴莫若知足，貴莫若無罪，壽莫若盡年，樂莫若無憂，善莫若全身，智莫若達道，明莫若內觀，慈莫若自愛，賢莫若自知，反視內聽，常自觀身，清淨無欲，空虛其心，万灾不干，道德滿身。

老子曰：道常欲人之生，而人不能保之，人若能虛其心，愛其神，保其氣，嗇其精，不須求道，而道自來。

老子曰：天象至遙，善應人心，謂道無靈，善知人情，禍福報應，其猶影響，子心未言，道聞子聲，子心欲動，天爲子恕，天道无心，其如人心，幽潛隙曲，莫不照臨，所以然者，一切善惡，諒在子心，心善則應善，心惡則應惡，永不乖也。

老子曰：心者微妙无形，出入身中，人不覺知，包裹天地，能入細微，急如掣電，疾若風馳，與道變化，心連色持，虛寂恬淡，常存不移，悟則易了，迷

則難知，不欲躁擾，唯願無爲。

老子曰：天地日月星辰，山河溪谷，風雲草木，鳥獸虫魚，一切万物，象衆雖多，靜而思之，總在心中，所以遠取諸物身，了然懸解，與道合真，尹喜稽首伏受要言。

老子玄通經亦曰天應經一卷

①「溫行」，疑當作「流行」。

②「貴」，疑此字爲衍文。